

Karnival kerjaya di Gambang hari ini

KUANTAN 8 Okt. - Universiti Malaysia Pahang (UMP) dengan kerjasama Talent Corporation Malaysia Bhd., akan menganjurkan karnival kerjaya selama dua hari bermula esok di Kompleks Sukan universiti itu kampus Gambang di sini.

Timbalan Naib Canselor (Hal Ehwal Pelajar dan Alumni), Prof. Dr. Yusserrie Zainudin berkata, pengajuran itu merupakan usaha komprehensif UMP dalam membantu bakal graduan meneroka peluang pekerjaan yang ditawarkan syarikat terbabit terutama dalam bidang kejuruteraan dan sebagainya.

"Menerusi program itu, penuntut atau bakal graduan akan diberi pendekahan dan latihan intensif mengenai persiapan lengkap sebelum memasuki dunia kerjaya.

"Selain itu, langkah semikian membuka ruang kepada pihak industri membantu kumpulan sasaran terbabit memperoleh jawatan bersesuaian di samping mengetengahkan syarikat tersebut kepada umum," katanya di sini hari ini.

Karnival itu akan dirasmikan Ahli Parlimen Paya Besar, Datuk Abdul Manan Ismail di kompleks sukan tersebut.

Dijangka kira-kira 30 syarikat tempatan menyertai karnival itu dan menawarkan sebanyak 200 peluang kerjaya selain sasaran 5,000 pengunjung hadir dalam program tersebut.

Antara syarikat yang menyertai karnival tersebut ialah Honda Malaysia Sdn. Bhd., Hicom Automotive Manufacturers Sdn. Bhd., Dicasting Sdn. Bhd., Proton Holding Bhd. dan banyak lagi.

Selain itu, pelbagai aktiviti juga diadakan seperti temuduga terbuka, ceramah kerjaya, pameran kerjaya dan keusahawanan.